

Milaka langilek mobilizazioak eta grebak egingo dituzte gaur

Guztien eskakizun amankomuna negoziazio kolektiboa bultzatzea da

Eusko Jaurilaritza, Renfe, FEVE, Iberia, Telefonica, irakaskuntza ez unibertsitarioa, Arabako eraikuntza, banka pribatua eta arazo puntualak dituzten hainbat enpresetako langileek greba eta mobilizazioak burutuko dituzte gaur. Langileek hitzarmenen negoziazio kolektiboak geldialditik atera nahi dituzte.

M.A. / BILBO

Enpresa publikoetako langileak izango dira batez ere gaur kalera aterako direnak, momentu hauetan hitzarmen kolektiboa sinatzeko arazo gehien dituztenak bait dira.

Santiago Bengoa CCOO sindikatuko Euskal Autonomi Elkarte (EAE) idazkari nagusiak atzo Bilbon adierazi zuenez, «sektore pribatuan negoziazio kolektiboa modu errazago batez eman da. Enpresari gehienek Gobernuaren gomendioei kaso egin barik eta errealtateaz jabetuz, konturatu dira soldatak ez direla konkurrentzia faltaren errudun». Sektore publikoetako enpresetako zuzendaritzek, ordea, «Gobernuaren esanei jarraituz, proposamen pro-



Josu Frade eta Santiago Bengoa UGT eta CCOOeko idazkariak.

J. SIMAL

bokatzaileak egin dituzte negoziazio kolektiboetan» Bengoak azaldu zuenez.

Banka pribatu eta Telefonica enpresek «pasa den urtean irabazi ugari izan ondoren langileei soldata igoera lotsagarriak» eskaini dizkietela salatu zuen Bengoak. «Telefonikak 60.000 milioi pezetako (3.333,33 milioi libera) irabaziak eta tarifak igo ondoren, negoziazio kolektiboa blokeatu du» zehaztu zuen. Renferi dagokionez, sindikatuarekin aurreakordioa lortu ondoren, bere proposamena «atzeratuta» duela kritikatu zuen.

«EZ DAGO ARRAZO POLITIKORIK»

Prensaurreko berean Josu Frade EAEko UGT sindikatuko idazkari nagusiak azpimarratu zuenez, «protesta ekintzak burutzeko deialdiak bateratzea ez da arrazoi politikoengatik egin, negoziazioak indar handiagoz bultzatzeko baizik».

Momentu hauetan dauden lan arazo gehienak zerbitzu publikoetan ematen ari dira. Mobilizazioek, beraz, hiritarren eragiten dute zuzenean eta «sektore publikoetako arduradunek sindikatu eta usuarioen arteko enfrontamendua» bilatzen du-

tela adierazi zuen Fradek. «Negoizazioak atzeratuz, sindikatuen irudia kaltetu nahi dute eta desgastea eragin. Grebaren lege berri murrizkorra kaleratzeko giroa prestatzen ari dira» salatu zuen UGTko kideak.

Bilbon gaur eguerdirako manifestazio deialdia egin duten UGT eta CCOOko arduradunek, agintariekin greba honetatik aterako duten «etekin politikoa» azpimarratu zuten. «Hauteskunde garaian ematen diren zerbitzu publikoetako arazoek, historiak frogatzen duenez, agintean dauden alderdi politikoei mesede egiten diete. Beraz, probokatutako arazoak direla pentsa erazten digu» adierazi zuten.

CAMPSAREN ARAZOAN ADOSTASUNIK EZ

Gainera, biharko mobilizazioetan UGT eta CCOO batera arituko badi-ra ere, Campsa konpainiaren arazoan ez dute adostasunik lortu. CCOO sindikatuak aurreakordioa sinatu du konpainiako zuzendaritzarekin eta «traiziotzat» hartua izan da UGTren aldetik.

CCOOk sinatu duen akordioak, % 6,5eko soldata igoera, asteko ordu erdiko lanordu murrizketa eta Campsa bi enpresatan banatzen denean soberan izango diren lanpostuak Repsolek hartzea jasotzen du.

Olabarriak galdegingo du euskal altzairu berezi arloaz

DONOSTIA

Emilio Olabarria Arabako EAJko diputatuak Claudio Aranzadi Espainiako Industria eta Energia ministroari gaurko Kongresuko osoko bilkuran azaltzeko eskatu du. Euskal diputatuak altzairu berezien sektoreak bizi duen egoera txarraz eta Administrazioak jarri beharreko premiazko neurriez galdegingo dio espainiar ministroari.

Olabarriak Acenor taldeko enpresetako neurriak eskatuko ditu batez ere. Enpresa hauetan Administrazioaren erantzunkizuna handiago da. Estatuak Banco de Crédito Industrialaren bidez Acenor kontrolatzen bait du. Arabako lantegietako neurri zehatzak ere eskatuko ditu Olabarriak, batez ere Aceros de Llodio enpresarentzat, berau taldeak dituen lantegietatik ahalenera bat delako.

Euskal diputatuak proposatuko dituen neurrien artean hokeno hauek daude: enpresa hauen finantz sancamentua, Acenor taldearen birprivatizazioa ahalbideratzeko negoziazioen hasiera, altzairu berezietako euskal enpresa taldearen sorrera eta, azkenik, lantegien berriztatze teknologikoa.

Martxoan 4.000 lagunek aurkitu zuten lana EAEn

DONOSTIA

Euskal Autonomi Elkarteko jendetza okupatua edo lan egiten duenaren kopuruan 4.000 pertsona gehiago izan ziren aurtengo martxoan aurreko hilaren aldean, otsailaren aldean alegia. Langabetu kopuruan 400 pertsona gehiago ziren eta kolektibo hau 155.000 pertsonaz osatua geratu zen iragan martxoan, biztanleria aktiboaren % 17.

Euskal Estatistika Erakundeak (EUSTAT) aurtengo martxoari buruz eginiko biztanleria ihardueraren inkestaren arabera, EAEko langabezia tasak biztanleria aktiboaren % 17 izaten jarraitu du eta, beraz, biztanleria aktiboak —lan egiteko gai dena— 4.400 pertsonako gehikuntza egin du. Biztanleria ez-aktiboa edo lan egiteko gauza ez denak, berriz, 3.600 pertsonatan gutxitu zen hila-bete horretan.

Egoera hau iazkoarekin, hau da, 1990eko martxokoarekin konparatuz gero, biztanleria okupatua 28.800 pertsonatan eta langabeak 3.500etan gehitu direla dela ikus daiteke.

Sexuen arabera, biek gehitu zuten okupatu kopurua iazko martxokoaren aldean, baina pixka bat gehiago gizonetakoak —15.100— emaku-

meek baino —13.800—. Emakumeak okupatu guztien % 32,6 osatzen dute. Langabetuetan ere, 6.700etan gehitu zen emakume langabeen kopurua, eta langabetu guztien % 60,6 izatera iritsi zen. Lanik gabeko gizon kopurua, ordea, 3.300 pertsonatan gutxitu zen.

GIPUZKOAN LANGABEZIA GUTXITU

Lurralde historikoei begiratzuz gero, azpimarratzekoa da hiruetan eman zela pertsona okupatu kopuruaren igoera iaiztik hona, batez ere Bizkaian —16.500 gehiago— eta Gipuzkoan —12.800 langile gehiago—, Araban egonkor jarraitu duen bitartean. Langabeziari dagokionez, Gipuzkoako jaitsiera da azpimarragarria —% 2,2 gutxiago—. Bizkaian 6.400etan igo zen langabe kopurua.

EAEko biztanleria adin taldeka hartuta, guztietan okupatu gehiago agertu dira, batipat 25 eta 44 urte bitarteko adin taldean —15.800 langile gehiago— eta baita 45 urtetik gorakoek ere —12.000 gehiago—. Langabeak ere adin talde gehienetan gehitu ziren, langabezia tasa 25 urtetik 44era bitartekoetan bakarrik jaitsi zelarik —% 2,9 gutxiago—. Igoera handiena 16 eta 24 urte bitartekoaren artean eman zen eta biztanleria aktiboaren % 40,9 geratu zen.



GOMAZKO pilotak eta porrak

erabili zituzten atzo Polizia Nazionalek behi eta baserritar talde baten aurka. Baserritarrek eta behiak Bilboko Bide Nagusian bildu ziren, Euskal Herriko Nekazarien Elkartek deitutako kontzentrazioan, J. SIMALEN argazkiak erakusten duenez. Taldea Gobernu Zibilera inguratzean, Poliziak gomazko pilotaz eraso zieten abere eta abeltzainei. Poliziaren ekintza bortitza

nahaste handia sortu bazuen ere, EHNEko ordezkariak idazki bat entregatu zuten Gobernu Zibilean. «Bertan, Euskal Herriko nekazarien arazoaren berri eman nahi izan dugu», esan zuen Jose Manuel Nuñez Bizkaiko EHNEko lehendakariak. Datozen egunetan beste ekintza batzuk egiteko asmoa dute eta Ekainaren 22an bukatuko dute Bilbon egingo den Euskal Herri osoko abeltzainen kontzentrazio batekin.